

Nto za Malongi ma Lukutakanu Zingu ye Salu Kieto kia Kikristu Nkand’a Malongi

2-8 KIA MAYU

TUSALU TUNA MUNA DIAMBU DIA NZAMBI | 1 SAMUELE 27-29

“Davidi Wasadila Ndekwa mu Nuana Vita”

Eyingidilu dia 1/3/2007 luk. 24 tini kia 7-8 Tusanisina Kumosi e Nkumbu a Yave

⁷ Davidi wawaika kuna Nobe yo tinina kuna zunga kia Afelesetia kwa Akisi wa Ntinu a Ngati, mbanza ina yawutukila Ngoleyate. Tezo kia 40 ma kilometa yakala ye Nobe. Davidi nanga wayindula vo e mbanza Ngati i fulu kiansuka ketinina, kadi Saulu kelenda kunsolola ko. Ke kolo ko, e ntaudi za ntinu Ngati zasungamena Davidi. Vava Davidi kazaya wo vo bansungamene, “omwene wonga wayingi mu kuma kia Akisi wa Ntinu a Ngati.”—1 Samuele 21:10-12.

⁸ Afelesetia bavava baka Davidi. Eyayi nanga i ntangwa ina Davidi kasoneka nkunga wau yo dodokela Yave vo: “Sia mansanga mame muna mbwat’aku.” (Nkunga 56:8) Wabunda e vuvu vo Yave ke kumvilakana ko, okunsadisa yo kuntanina. Davidi wasadila mpe ndekwa mu vunginika ntinu a Afelesetia. Wavunina e kilau. Akisi wa Ntinu ofwemene selo yandi, wau bantwasila “lau” kia muntu. Kieleka, o Yave wasambula e ndekwa kasadila Davidi.—1 Samuele 21:13-15.

Eyingidilu dia Malusu, 2021 luk. 4 tini kia 8 Matoko, Adieyi Nulenda Vanga Kimana Akaka Banubunda e Vuvu?

⁸ Owau, tala diambu diankaka diampasi kanuana diau o Davidi. Vava Davidi kakuswa se ntinu, diavava vo kavingila kolo kiayingi muna yantika yala se ntinu a Yuda. (1 Sam. 16:13; 2 Sam. 2:3, 4) Muna kolo kiokio, nki

kiasadisa Davidi mu vingila kuna luzindalalu lwawonso? Vana fulu kia sia e sungididi muna mambu mankendeleva, Davidi wasia e sungididi mu dina kalenda vanga. Kasikil’owu, vava katinina kuna zunga kia Afelesetia, Davidi wasadila ekolo kiakina muna nuanisa e mbeni za Isaele. Muna vanga wo, watatinina e mingilu mia zunga kia Yuda.—1 Sam. 27:1-12.

Perspicaz vol. 2 luk. 808 tini kia 5 Luvunu

Kana una vo e Bibila kisimanga o luvunu, ediadi ke disongele ko vo o muntu kafwete zayisanga mawonso kwa awana ke bena yo nswa wa zaya mo ko. Yesu walonga vo: “Ke nuvani lekwa yavauka kwa mbwa ko, ngatu tuba pelola zeno vana vena e ngulu kimana zalembi diatakeswa kuna nsi a kole yau yo viluka, zanutatika.” (Mat. 7:6) Ekiaki i kuma ezak’e ntangwa o Yesu kazayisilanga mawonso ko ngatu vana e mvutu za yuvu yawonso ina kayuvulwanga, kadi wazaya wo vo ediadi vonza diadi twasa. (Mat. 15:1-6; 21:23-27; Yoa. 7:3-10). Kieleka, e mpila Abarayama, Isaki, Rakabi ye Elesa bavengela zayisa o mambu kwa wantu ana ke basambilanga Yave ko, ina se mbandu kwa yeto.—Tuku 12:10-19; Yos. 2:1-6; Yak. 2:25; 2 Nti. 6:11-23.

Tusalu twa Mwanda

Eyingidilu dia 1/7/2010 luk. 22 tini kia 5-6 Amafwa nga Balenda Sadisa Awana Bena Moyo?

Badika edi. Nkand’a Nzambi uvovanga vo o muntu vava kefwanga ‘mu ntoto ke-vutukanga’ e “makani mandi mavididi.” (Nkunga 146:4) Saulu ye Samuele bazaya wo vo Nzambi otumbanga evangu dia

vava nganga za matombola. Kuna lubantiku, Saulu nkutu wavita o ntu mu kûla nka-ngu muna mavangu ma mianda mia nkwiya. —Fuka 19:31.

Badika e diambu edi. Avo Samuele wa nkwa kwikizi kakala ye moyo nze mwanda, nga wadi kulula e nsiku mia Nzambi yo sala kumosi ye ngang’a matombola mu wana-na yo Saulu? Yave kazola mokena yo Saulu ko. Nga ngang’a matombola wadi komeke-na Nzambi a Mpungu Ngolo mu mokena yo Saulu muna sadila Samuele wafwa? Ve. Dialudi vo “Samuele” ndiona ke yandi ko i ngunza akwikizi a Nzambi. Kansi, nkwiya wabaka e mpwa ya Samuele.

9-15 KIA MAYU

TUSALU TUNA MUNA DIAMBU DIA NZAMBI | 1 SAMUELE 30-31

“Uyikumikina Muna Yave wa Nzambi Aku”

Eyingidilu dia 1/8/2006 luk. 30 tini kia 12 Vumina Yave yo—Vwa Nsambu

¹² O vumi wa Davidi muna Yave wansadisa mu vanga mayingi ke mu venga kaka vanga oma mambi ko. Wankumika mu vanga oma mansongi muna ntangw’a mpasi. O Davidi y’akwandi, mvu ye ngonde ya batinina kuna Sikelange muna nsi a Afelesetia. (1 Samuele 27:5-7) Vava bavaika mu fikolo, asanzi a Aneyamaleke bakota yo yoka e mbanza, banata akala awonso bakala mo y’akento ye wana ye makambi mau. O Davidi y’akw’andi vava baluaka yo mona mana mavangama, batumbwidi ndinga yo dila. Ke kolo ko e dilu kivilukidi se makasi, e selo yandi yava-va kuntubil’o matadi. Kana una vo mu mpasi kakala, Davidi kadimbula vuvu ko. (Ngana 24:10) O vumi wandi kwa Nzambi wamfila mu vava Yave yo ‘kuyikumikina muna Yave

wa Nzambi andi.’ Muna lusadisu Iwa Yave, Davidi y’akwandi, basolola Aneyamaleke yo baka yawonso banata.—1 Sam. 30:1-20.

Eyingidilu dia 15/4/2012 luk. 30 tini kia 14 Yave Okutuyingilanga Muna Luvuluku

¹⁴ Davidi mpasi zayingi kawanana zau muna zingu kiandi. (1 Sam. 30:3-6) E mvovo miandi miavumunwinwa misonganga vo Yave wazaya mpasi zandi. (**Tanga Nkunga 34:18; 56:8.**) Yave otomene zaya mpasi zeto. Vava ‘tubudikanga ntima’ yovo “kendalala,” okutufinamanga. Ediadi dilenda kutufiaulwisa nze una diafiaulwisa Davidi ona wayimbila vo: “Mun’ekembo ye kiese muna walakazi waku: Kadi wamona mpasi zame; wazaya ntantu zame za moyo.” (Nku. 31:7) Kansi, Yave mayingi kevanganga ke bakula kaka mpasi zeto ko. Okutukumikanga yo kutufiaulwisa. O tukutakanu twa Kikristu i mpila yambote kevangilanga wo.

Tusalu twa Mwanda

Eyingidilu dia 1/6/2005 luk. 32 tini kia 8 Mambu Mamfunu ma Nkand’Antete a Samuele

30:23, 24. E mvovo mina muna Ntalu 31:27 misonganga vo Yave oyangalelanga awana besalanga salu ya sakalala muna nkutakani. Konso mpila salu tusalanga, bika ‘twasala kio ye nsi a ntima, nze kuna kwa Yave, ke kwa wantu ko.’—Kolosai 3:23.

16-22 KIA MAYU

TUSALU TUNA MUNA DIAMBU DIA NZAMBI | 2 SAMUELE 1-3

“Adieyi Tulenda Longoka Muna Mbembo Yayikilwanga vo ‘Tá’?”

Eyingidilu dia 15/6/2000 luk. 13 tini kia 9 Nuzitisa Awana Bavewa e Wisa Vovo Nuina

⁹ Nga Davidi wakendalala vava kamweswa e mpasi? Davidi wadodokela Yave vo: “Akwa nsoki bavavidi moyo ame.” (Nkunga 54:3) I bosi, waziula ntim’andi kwa Yave vo: “Umpuluza muna mbeni zame, e Nzambi ame . . . Akwa ngolo bandwanisi. Ke mu kuma kia sia ko vo kolama nkolamene ngatu sumuka, e Yave. Kana una vo kivantidi mbi ko, balundumukini yo kubama kimana bandwanisa. Telama muna kuma kia kazu kiame, watala.” (Nkunga 59:1-4) Nga wamweswa kala e mpasi kwa nkwa wisa kondwa kuma kiasikila? Davidi kayambula songa luzitu ko kwa Saulu. Vava Saulu kafwa, vana fulu kia yangalala, Davidi wayimbila e mbembo: “Saulu yo Yonatane batoma zolwa yo yangalelwa ekolo bakala o moyo . . . Basunda ngo-e zulu o nswalu, basunda nkosi e ngolo. E yeno wan’amakento a Isaele nudila Saulu.” (2 Samuele 1:23, 24) Ekwe mbandu ambote kasonga Davidi ya zitisa e kuswa kia Yave kana una vo Saulu wakadila yandi mu mpi-la yambi!

Eyingidilu dia 15/4/2012 luk. 10 tini kia 8 Oyekola Sinsu kia Lumbu Yambaninu!

⁸ Nkand’a Nzambi uyikanga wantu ayingi basikila ye kwikizi. Yambula twabadika nona yole muna wantu awaya ye una tulenda kubatanginina. Entete, tubadika nona kia Yonatane wasonga kwikizi kiasikila muna Davidi. Yonatane wa mwan’antete a Saulu wa Ntinu, yandi wakala yo nswa wa vinga vana kunda kia kintinu kia Isaele. Kansi, Yave wasola Davidi vana fulu kiandi. Yonatane wazitisa e nzengo za Nzambi. Vana fulu kia mwena Davidi kimpala, “o moyo a Yonatane ubakanini yo moyo a Davidi,” yo sia nsilu vo okwamanana songa kwikizi muna yandi. Wavana mwatu miandi, nso-solo, ta ye mpond’andi kwa Davidi. (1 Sam. 18:1-4) Yonatane wavanga mawonso muna ‘kumika Davidi’ yo sia nkutu e zingu kiandi

mu vonza muna kuntanina vana moko ma Saulu. Yonatane wavovesa Davidi vo: “Ngeye okala ntinu muna Isaele, omono i nlandi omo ngeye.” (1 Sam. 20:30-34; 23:16, 17) Muna kuma kiaki, vava Yonatane kafwa, Davidi muna mbembo kabonga wasonga lukendalalu yo zola kakala kwau muna Yonatane.—2 Sam. 1:17, 26.

Tusalu twa Mwanda

Perspicaz vol. 2 luk. 421 tini kia 2 Mpangi

Davidi wasoneka vo: “Ekwe wete, ekwe kiese kwa ampangi bakadilanga vamosi muna ungudi!” (Nku. 133:1) E mvovo miami misonganga vo ke ampangi kaka ko muna kinitu bekadilanga mu kintwadi yo luvuvamu. Kieleka, o zola kakala kwau o Davidi muna Yonatane ye mpila batokanenanga e wete dia muntu yo nkwardi, yamfila mu kunyikila vo mpangi ame. (2 Sam. 1:26) Muna kuma kiaki, akundi ana bena ye fu yafwanana kana nkutu vo fu yambi, balenda yikilwa vo ampangi.—Nga. 18:9.

23-29 KIA MAYU

TUSALU TUNA MUNA DIAMBU DIA NZAMBI | 2 SAMUELE 4-6

“Vumina Yave Walembi Kunkendeleka”

Eyingidilu dia 1/7/2005 luk. 9 tini kia 7 Mambu Mamfunu ma Nkand’ezole a Samuele

6:1-7. Kana una vo luzolo lwa Davidi lwa natina e Nkele mun’ekalu lwambote lwakala, ke lwakala ngwizani ko ye nsiku mia Nzambi, e mfoko, mfwilu diatwasa. (Luvaiku 25:13, 14; Ntalu 4:15, 19; 7:7-9) Ekani dia Uza dia simba e Nkele yadi bwa disonganga vo makani mambote ke mesobanga nkanikinu mia Nzambi ko.

**Eyingidilu dia 1/2/2005 luk. 32 tini kia 20
Mawonso Kevanganga o Yave Mansongi**

²⁰ Sungamena vo Uza watoma zaya e Nsiku. E Nkele Yave yasunzulanga. O Nsiku wayikanga vo ke yilendi simbwa kwa muntu ko kondwa nswa ye awana bekulula o nsiku wau bafwete vondwa. (Ntalu 4:18-20; 7:89) Ikuma vo, o nata Nkele ke diakala diambu diakete ko. Uza nlevi kakala (kansi kakala nganga ko), i dianu vo watoma zaya o Nsiku. Vana ntandu, vioka mvu miayingi vava Nkele yanatwa kuna nzo a s'andi ke vabwa diambu ko. (1 Sam. 6:20–7:1) Muna nzo au yalundilwanga mu tezo kia mvu 70 yavana Davidi kasoba yo e fulu. I dianu vo, tuka kileke Uza wazaya e nsiku wavovanga vo e Nkele ka ifwete simbwa ko.

**Eyingidilu dia 1/2/2005 luk. 32 tini kia 21
Mawonso Kevanganga o Yave Mansongi**

²¹ Nze una uyikilu kala, o Yave olenda zaya oma mena muna ntim'a muntu. Wau vo e Diambu diandi diyikilanga evangu dia Uza vo "mpilakanwa," Yave nanga makani mambi kamona muna ntim'andi ke meyi-kwanga ko muna Nkand'a Nzambi. Nanga Uza nkwa lulendo kakala muna kulula e nsiku. (Ngana 11:2) Nga tundidika kayitundidika muna vaikisa e Nkele ina yaswekwanga kw'esi nzo andi? (Ngana 8:13) Nga Uza lukwikilu kakondwa mu yindula vo o koko kwa Yave kwakufama mu tanina e Nkela yansunzulanga? Konso una wakala e ngindu zandi, tulenda kala ye vuvu vo Yave diansongi kavanga. Nanga diambu diambi kamona muna ntima Uza diamfila muna kuntumba vana vau.—Ngana 21:2.

Tusalu twa Mwanda

**Eyingidilu dia 1/7/2005 luk. 9 tini kia 8
Mambu Mamfunu ma Nkand'ezole a Samuele**

6:8, 9. Vava Davidi kakala mu mpasi, wafunga makasi yo mona wonga. Watumba Yave mu kuma kia mpasi zambwila. Tufwete kuyikenga twalembi tumba Yave vava tubwiliwanga mpasi mu kuma kia kulula nkanikinu miandi.

30 KIA MAYU–5 KIA YUNI

TUSALU TUNA MUNA DIAMBU DIA NZAMBI | 2 SAMUELE 7-8

“Yave Wakanga e Kangu yo Davidi”

**Eyingidilu dia Abidi-Yuni, 2010 luk. 20 tini
kia 3**

“Kimfumu Kiaku Kisikidiswa”

Yave wayangalela luzolo lwambote kasonga o Davidi. Muna vana e mvutu kwa Davidi mu kuma kia vumi wandi yo lunganesa ungunza, a Nzambi wakanga ekangu ye Davidi wamvovesa vo osola muntu muna luvila lwandi ona oyala yakwele mvu. Natani wazayisa nsilu wau wa Nzambi kwa Davidi: “E nzo aku ye kimfumu kiaku kisikidiswa vovo wina yakwele mvu: e kunda kiaku kisikidiswa yakwele mvu.” (Tini kia 16) Nani ovinga mun'ekangu diadi, ona oyala yakwele mvu? —Nkunga 89:20, 29, 34–36.

**Eyingidilu dia Abidi-Yuni, 2010 luk. 20 tini
kia 4**

“Kimfumu Kiaku Kisikidiswa”

Yesu wa Nazarete wakala se mbongo a Davidi. Vava mbasi kasamuna luwutuku lwa Yesu, wavova vo: ‘Yave wa Nzambi okumvan'e kunda ki'es'andi Davidi: kayala muna nzo a Yakobo yakwele mvu; e kintinu kiandi ke kina nsuka ko.’ (Luka 1:32, 33) Muna kuma kiaki, ekangu kakanga Yave yo Davidi, muna Yesu Kristu dialunganena. Ka solwa kwa wantu ko mu yala se ntinu, kansi Nzambi wamvana o nswa wayala yakwele mvu muna lungisa nsilu andi. Diambote twasungamena vo nsilu

mia Nzambi mia ludi ye milungananga.—Yesaya 55:10, 11.

**Eyingidilu dia 15/10/2014 luk. 7 tini kia 14
Kala ye Lukwikilu Lwasikila Muna Kintinu**

¹⁴ Yave wasia nsilu kwa Davidi wa Ntinu a Isaele yankulu. O nsilu wau uyikilwanga vo **ekangu dia Davidi. (Tanga 2 Samuele 7: 12, 16.)** Yave wasia nsilu vo Masia okala mosi muna mbongo a Davidi. (Luka 1:30-33) Muna mpila yayi, Yave wayika mambu makaka masikididi mu kuma kia luvila kewutukila o Masia. Yave wavova vo e mbongo a Davidi ikala yo ‘nswa’ wa kala se Ntinu a Kintinu kia Masia. (Yezekele 21:25-27) E kintinu kia Davidi kiyala yakwele mvu, kadi Yesu wa mbongo a Davidi ‘okala yakwele mvu, e kunda kiandi nze ntangwa.’ (Nkunga 89:34-37) Tuna ye ziku vo luyalu lwa Masia ke lusanga yiviswa ko, e nsambu za luyalu lwalu zakwele mvu.

Tusalu twa Mwanda

**Perspicaz vol. 3 luk. 751 tini kia 1
Lumbu Yambaninu**

Ungunza wa Bilami. Vitila Aneyisaele bakota muna Nsi a Nsilu, Bilami wa ngunza wavovesa Balaki wa ntinu a Moabe vo: “Wiza yazayisa mana nkangu wau [Isaele] uvanga kwa nkangu aku kuna ntwala. . . . E ntetembwa ituka muna Yakobo, e mvuala itelama muna Isaele. Oyandi obosola kieleka o lose lwa Moabe e valanganza ya ntu mia wan’awonso a mvuanga.” (Nta. 24:14-17) Muna ndungan’antete a ungunza wau, diamoneka vo e “ntetembwa” i Davidi wa Ntinu ona watufakesa esi Moabe. (2 Sam. 8:2) Kieleka, muna ndungan’a ungunza wau wasikididi, e “lumbu yambaninu” yayantika vava Davidi kakituka se ntinu. Wau vo Davidi wakala se kini kia mana Yesu kadi vanga nze Ntinu a Kintinu kia Masia, o ungunza wau mpe uyi-

kanga e ntangwa ina o Yesu ketufakesa e mbeni zandi.—Yes. 9:7; Nku. 2:8, 9.

6-12 KIA YUNI

TUSALU TUNA MUNA DIAMBU DIA NZAMBI | 2 SAMUELE 9-10

“Davidi Wasonga o Zola Kwakieleka”

**Eyingidilu dia 15/6/2006 luk. 14 tini kia 6
Olenda Solola e Kiese Kiakieleka!**

“Davidi wasoneka vo: “Nkwa kiese muntu osadisanga nsukami; Yave okumvuluza muna lumbu kia mpasi. Yave okuntanina yo lunda moyo andi. Oyikilwa vo nkwa kiese.” (Nkunga 41:1, 2) O wete Davidi kasonga kwa mwan’a Yonatane wa nkundi andi, i sia vo, Mefibosete wa mvanguki, una se mbandu ambote ya una tufwete kadilanga ye awana bena vo asukami.—2 Samuele 9:1-13.

**Eyingidilu dia 15/7/2005 luk. 9 tini kia 11
Mambu Mamfunu ma Nkand’ezole a Samuele**

9:1, 6, 7. Davidi walungisa o nsilu andi. Yeto mpe tufwete lungisanga e nsilu mieto.

**Eyingidilu dia 15/2/2002 luk. 14 tini kia 10
Banuana ye Lusende Muna Nitu**

¹⁰ Muna mvu mialanda, Davidi wa Ntinu wasonga walakazi kwa Mefibosete mu kuma kia zola kwandi muna Yonatane. Davidi wamvutulwila e yana yawonso ya Saulu yo vovesa Siba wa ntaudi a Saulu vo kalunga-lunga yo. Davidi wavovesa mpe Mefibosete vo: “Odila vana meza mame lumbu ke lumbu.” (2 Samuele 9:6-10) Kieleka, o walakazi kasonga Davidi kwa Mefibosete wamfiulwisa kikilu. Wasadisa mpe Mefibosete mu katula e ngindu za sia vo kakala mfunu ko. Ekwe longi diamfunu! Oyeto mpe tufwete songanga o walakazi kwa awana benuananga ye lusende muna nitu.

Tusalu twa Mwanda

Perspicaz vol. 1 luk. 307

Nzevo

Kuna nz'ankulu nkangu miayingi kuna Este kumosi ye Aneyisaele, babadikilanga e nzevo se sinsu kia luzitu. O nsiku a Nzambi wasimanga e fu kia tenda e nsuki muna "kinzieta kia ntu" yo zenga e nsuka za nzevo. (Lev. 19:27; 21:5) Ediadi diavangamanga kadi kuna kwa zula yankaka, ekiaki kiakala se sinsu kia nsambila.

13-19 KIA YUNI

TUSALU TUNA MUNA DIAMBU DIA NZAMBI | 2 SAMUELE 11-12

"Kuyambula ko vo e Zolela Yambi Yalya"

Eyingidilu dia Yuni, 2021 luk. 17 tini kia 10 Olenda Vuluka Muna Ntambu mia Satana!

¹⁰ E loko, diafila Davidi wa Ntinu mu vilakana e lekwa yawonso ina Yave kamvana, i sia vo, kimvuama, kintinu ye wansadisa muna sunda e vita zayingi. Davidi wavutula matoondo yo vova vo e lekwa ina Nzambi kamvana 'ke ilendi tangakana ko!' (Nku. 40:5) Kansi kuna kwalanda, Davidi wawilakana yawonso Yave kamvana. Wakituka nkwa loko yo vava diaka lekwa yayingi. Kana una vo Davidi akento ayingi kakala yau, wayantika yima e zolela yambi muna ntima mu kuma kia nkeno angani. O nkento ndioyo i Bate-seba wa nkaza Uriya wa Nkete. Kuna loko diawonso, Davidi wavukana yo Bate-seba yo yimita. E zumba katá, sumu diampwena kikilu, kansi Davidi wavanga diaka e nkubika muna vondesa Uriya. (2 Sam. 11:2-15) Adieyi Davidi kayindula? Nga wayindula vo Yave kamonga ko mana kavanganga? Kana una vo Davidi wasadilanga Yave ye kwikizi kiawonso

mu mvu miayingi, wakituka se nkwa loko yo baka mfwilu miayingi. Kansi, diakiese mu zaya vo, vana vau Davidi watambulwila e sumu diandi yo viluka o ntima. Ekwe kiese kamona Davidi wau vo Yave wanloloka! —2 Sam. 12:7-13.

Eyingidilu dia Setemba, 2019 luk. 17 tini kia 15

Ekuma Tufwete Sakalela Yave?

¹⁵ Vana ntandu a kala se mfidi a nzo andi, Yave wasola mpe Davidi kakala mfidi a zula kia Isaele. Wau vo ntinu, Davidi wisa kiayingi kakala kiau. Ezak'e ntangwa, kasadilanga e wisa kiandi mu mpila yambote ko, wawanganga mambu mayingi mambi. (2 Sam. 11:14, 15) Kansi, muna tambulwila malongi kavewanga, Davidi wasonganga vo wasakalelanga Yave. Waziulanga o ntim'andi kwa Yave muna sambu. Wawanganga mawonso muna lemvokela luludiku lwa Yave. (Nku. 51:1-4) Vana ntandu, Davidi nlembami kikilu kakala, kadi watambulwilanga malongi mambote kavewanga, ke kwa akala kaka ko, kansi ye kwa akento mpe. (1 Sam. 19:11, 12; 25:32, 33) Davidi walongoka muna bi wandi, wakitula e nsambil'a Yave se diambu diasunda o mfunu muna zingu kiandi.

Eyingidilu dia Yuni, 2018 luk. 16 tini kia 7 Yambula e Nsiku ye Nkanikinu mia Nzambi Mialonga e Ntona Zaku

⁷ Muna zaya edi diambote y'edi diambi, ke dina mfunu ko twateka baka ntete e mfwilu mu kuma kia lembi lemvokela e nsiku mia Nzambi. Tulenda mio longoka muna vilwa wa wantu akaka kuna nz'ankulu. E nona yayi ina muna Nkand'a Nzambi. E sono kia Ngana 1:5 kivovanga vo: "O nkwa ngangu kawa, kanungunukw'o zayi." E luludiku lwalu kwa Nzambi lwatuka ye lwambote kikilu. Muna bonga e nona, yindula e mpasi kamona o Davidi vava kakolamena Yave yo

tá e zumba yo Bate-seba. (2 Samuele 12: 7-14) Vava otanganga lusansu lwalu ukiyuvula: 'Aweyi Davidi kadi vengela e mpasi zazi? Aweyi yadi vanga muna diambu diadi? Vava itontwanga mu tá e zumba, nga Davidi itangininanga yovo Yosefe?' (Tuku 39:11-15) Avo tutomene badika e mfwilu mia sumu, tukala ye tima dia 'menga oma mambi.'

Tusalu twa Mwanda

Eyingidilu dia 1/10/2010 luk. 6 tini kia 11 'S'eno Nkwa Nkenda'

¹¹ Vava Davidi yo Bate-seba balolokwa esumu diau, bavevolwa muna tumbu kia lufwa. Afundisi a Isaele ke bavewa nswa ko wa loloka masumu. Kele vo bavewa o nswa wa kubafundisa, ke badi baka nzengo zakaka ko, za lufwa kaka. Kadi i diavavwanga muna Nsiku. Kansi, muna kuma ki'ekangu kaka-nga yo Davidi, Yave wavava zaya kana vo esumu dia Davidi diafwana lolokwa. (2 Samuele 7:12-16) Muna kuma kiaki, wau vo Yave wa Nzambi i "Mfundisi a nza yawonso," ona "osatanga ntima," wabaka nzengo za fundisa dio yandi kibeni. (Tuku 18:25; 1 Tutsansu 29:17) Vava Nzambi kafimpa ntima Davidi yo mona vo waviluka kieleka o ntima, wanloloka.

Eyingidilu dia 15/11/2012 luk. 23 tini kia 9-10

Adieyi Ofwete Vanga Muna Lolokwa kwa Yave?

⁹ Yave katanina Davidi ko muna mpasi zati twasa masumu mandi. E mpasi zazi zakwamanana muna zingu kiandi kiawonso. Kansi, wau vo Davidi 'wabudika yo kosomoka o ntima,' Yave wanloloka. (**Tanga Nkunga 32:5**; Nku. 51:17) Nzambi wa Mpungu-ngolo ozayanga e ngindu ye kuma kifilanga muntu mu vola esumu. Muna kuma kiaki, Nzambi kayambula ko vo Davidi yo Bate-seba ba-

fundiswa kwa wantu mun'owu wa Nsiku a Mose. Yandi kibeni wabafundisa yo kubasonga e nkenda. (Lev. 20:10) Nzambi wasola mwan'au Solomo mu kituka se ntinu a Isaele.—1 Tus. 22:9, 10.

¹⁰ Nanga e kuma kiakaka kiafila Yave mu loloka Davidi i kia sia vo yandi mpe kaloloka Saulu. (1 Sam. 24:4-7) Nze una Yesu kavova, Yave okadilanga yeto nze una tukadilanga y'akaka. Yesu wavova vo: "Ke nufundisa ko, nwalembi fundiswa. Kadi muna mfundisa nufundisa i nufundisilwa: muna nzongo nuzongela mpe i kikunuzongelwa." (Mat. 7:1, 2) Dia lufiaulwisu kikilu mu zaya vo Yave osinga loloka masumu meto, kana nkutu masumu mampwena nze esumu dia zumba yovo dia vonda muntu! Kansi, okutuloloka kaka kele vo oyeto mpe *tulolokanga akaka, funguna masumu meto* kwa yandi yo *viluka o ntima* muna masumu meto. Yave ovananga 'nsungi ya mvutulu a moyo' vava asumuki *bevilukanga kikilu o ntima*.—**Tanga Mavangu 3:19.**

20-26 KIA YUNI

TUSALU TUNA MUNA DIAMBU DIA NZAMBI | 2 SAMUELE 13-14

"E Loko dia Amenone Mfwilu Miayingi Diatwasa"

Perspicaz vol. 1 luk. 31 Abesalome

Lufwa lwa Amenone. Wau vo Tama wa nsang'a Abesalome mote kakala, ediadi diafila Amenone wa mpangi andi mu kunlengoke-la. Amenone wakivunina o yela, walomba vo bantwasila Tama muna nzo andi kanlambila madia. I bosi, wanleka mu kingolo. O zola kwa Amenone muna Tama, kwakituka se lumengo yo lombwa vo bavaikisa Tama kuna mbazi. Tama wasia ntoto ampolo vana

ntu andi, watiazuna e mvuela ambote-mbote ina kavuata yo wanana yo Abesalome. Vana vau, Abesalome wafimpulula e diambu yo bakula vo Amenone wanleka mu kingolo, kadi wateka wo zaya vo Amenone Tama kalengokelanga o moyo. Muna kuma kiaki, Abesalome wakanikina nsang'andi kalembi dio zayisa kwa akaka. I bosi, wanata Tama kazingila muna nzo andi.—2 Sam. 13:1-20.

Eyingidilu dia Setemba, 2017 luk. 5 tini kia 11

Kalanga ye Volo

¹¹ O Nkand'a Nzambi uyikanga mpe nona ya wantu ana ke balenda zizidila ntonta za tá zumba ko. E nona yayi isonganga e mfwilu tulenda baka avo tukondelo e volo. Avo ntonta nze za Kim onuananga zau, yindula e nona kia toko dia zowa oyikwanga muna Ngana kapu kia 7. Yindula mpe nona kia Amenone ye mfwilu miatwasa e vangu diandi. (2 Samuele 13:1, 2, 10-15, 28-32) Mase balenda sadisa wan'au mu kala ye volo ye ngangu muna vovelanga e nona yayi muna nsambila ya esi nzo.

Perspicaz vol. 1 luk. 31-32 tini kia 9 Abesalome

Mvu miole miavioka. E ntangwa ya saka e mika mia mameme yafwana, ntangw'a nklinzi yakalanga. Abesalome wakubika nkinzi yo bokelesa wana awonso a ntinu kumosi yo Davidi kuna Bale-kaso, yakala tezo kia kilometa 22 kuna node a Yerusaleme. Davidi katambulwila ko, kansi Abesalome wasiandama vo katuma Amenone, wa mwan'andi antete kenda vana fulu kiandi. (Nga. 10:18) Kuna nkinzi, vava Amenone 'kayangalala mu kuma kia vinyu,' Abesalome wakanikina ntau-di zandi vo bamvonda. O wana ankaka a Davidi bavutuka kuna Yerusaleme. Abesalome watina yo kwenda kwa nkak'andi wa musi Suria kuna Ngesu. (2 Sam. 13:23-38) O

“nsosolo” kayika o Natani wa ngunza wakota muna “nzo” a Davidi ye wakwamanana mûna muna zingu kiandi kiawonso.—2 Sam. 12:10.

Tusalu twa Mwanda

Desperta! ya 22/12/2004 luk. 8-9

Mpila Vienga Kuna Kusundidi o Mfunu

Badika e nona kia Abesalome, mosi muna wan'a Davidi. Kana una vo mpw'ambote kakala yau, muntu ambi kakala. Bibila kivovanga mu kuma kiandi vo: “Muna Isaele yawonso ke mwakala muntu ko waluta sanisinuanga muna mpw'andi ambote nze Abesalome. Tuka kuna mband'a ntu yamuna tambi yandi kakala ye fu ko.” (2 Samuele 14:25) Kansi, e loko dia Abesalome diamfila mu telamena se diandi yo kutumuna e kunda kia kintinu. Walwaka nkutu mu tezo kia leka makangu ma se diandi mu kingolo. Muna kuma kiaki, Yave wafungila Abesalome o makasi yo yambula vo kafwa o lufwa lwampasi.—2 Samuele 15:10-14; 16:13-22; 17:14; 18:9, 15.

Nga wadi zola kala nkundi Abesalome? Ve kikilu. Kadi muntu mbi kakala. O vienga kwandi ke kwankakidila ko mu kala nkwa lulendo yo munkondwa kwikizi ngatu kakidila lufwasu lwandi. Kuna diak'e sambu, muna Bibila muna ye nona ya wantu ana bakala vo akwa ngangu ye wantu ambote ana ke beyikwanga ko mu kuma kia mpw'au ambote. Kieleka, edi diasunda o mfunu i vienga kwau kwa nsi a ntima.

27 KIA YUNI–3 KIA YULI

TUSALU TUNA MUNA DIAMBU DIA NZAMBI | 2 SAMUELE 15-17

“O Lulendo Lwafila Abesalome mu Kollama”

Perspicaz vol. 3 luk. 304

Ndiona Wavita

Kuna Este, nkumbu miayingi alundumuki bayendanga kuna ntwala kalu dia ntinu mu zayisa nkangu vo ntinu olweke yo kubika mawonso mavuanga o mfunu. (1 Sam. 8:11) Abesalome yo Adoniya i diau bavana. Muna vava kuyitundidika yo songa o umvuania wau, bakubika wantu 50 ana bazaula kuna ntwala makalu mau.—2 Sam. 15:1; 1 Nti. 1:5.

Eyingidilu dia 15/7/2012 luk. 13 tini kia 5 Sadila Nzambi a Luvevoko

⁵ Nkand'a Nzambi uyikanga wantu ayingi ana bavukumuna akaka. Mosi muna wantu awaya i Abesalome wa mwan'a Davidi wa Ntinu. Abesalome mpw'a mbote kakala yau. Kansi, muna kuma ki'eloko diakala muna ntim'andi, nze Satana, wayantika lokokela kunda kia kintinu kia s'andi kina kakadila ye nswa ko. Muna vava kutumuna kintinu, Abesalome wayantika vunginika Aneyisaele vo wetu diau katokanenanga yo kubasonga vo ke ven'ona watumbwa kwa ntinu ko lenda kubawila. I bosi, nze una kavanga Satana muna mpatu a Edene, Abesalome wayisonga kwa Aneyisaele nze mvangi a mawete yo tianguna se diandi.—2 Sam. 15:1-5.

Perspicaz vol. 1 luk. 311

Keberone

Ke vavioka mvu miayingi ko, Abesalome wa mwan'a Davidi, wavutuka kuna Keberone yo funga muna kani diandi dia vava kutumuna e kintinu kia se diandi. (2 Sam. 15:7-10) Nanga Abesalome wasola Keberone mu lungisa e kani diandi, kadi yakala se mbanz'a kimfumu ye fulu kina kawutukila. Kuna kwalanda, o Ntinu Rekabame wa ntekelo a Davidi, watungulula e mbanz'a Keberone. (2 Tus. 11:5-10) Kuna nim'a lufwasu lwa Yuda kwa esi

Babele, akaka muna Ayuda ana banatwa mu kinkole vava bavutuka, bayantika zingila kuna Keberone (Kireyate-araba).—Nek. 11:25.

Tusalu twa Mwanda

Eyingidilu dia Agositu, 2018 luk. 6 tini kia 11

Nga Otomene Zaya e Ziku kia Diambu?

¹¹ Vekala ye ntangwa tulenda kendalala mu kuma kia nsangu zimwanganeswanga mu kuma kieto zina vo ndambu ludi, e ndambu luvunu. I diau diabwila Mefibosete. Davidi wa ntinu wavana Mefibosete e yana yawonso ya Saulu wa nkak'andi. (2 Samuele 9:6, 7) Kansi kuna kwalanda, Davidi wawá mambu maluvunu mu kuma kia Mefibosete. Davidi kateka fimpa mambu mama ko mu zaya kana vo maludi, wabaka mavua mawonso ma Mefibosete. (2 Samuele 16:1-4) Kuna kwalanda, vava kamokena yandi, Davidi wabakula vo vilwa kavanga. I bosi, wavutulwila Mefibosete e yana yankaka. (2 Samuele 19:24-29) Kele vo Davidi wateka vava zaya e ziku kia diambu vitila kabaka nzengo, Mefibosete kadi mona mpasi zazi zawonso ko.

